



Masjid Adalah Wajah Kariah

28 Jun 2024M/ 21 Zulhijjah 1445H

Disediakan oleh: Al-Hady Centre

الْحَمْدُ لِلَّهِ الْقَائِلِ: قُلْ إِنَّمَا أَنَا بَشَرٌ مِّثْلُكُمْ يُوحَىٰ إِلَيَّ أَنَّمَا إِلَهُكُمُ إِلَهُ وَاحِدٌ فَاسْتَقِيمُوا
إِلَيْهِ وَاسْتَغْفِرُوهُ ۖ وَوَيْلٌ لِّلْمُشْرِكِينَ ﴿١﴾

أَشْهَدُ أَنْ لَا إِلَهَ إِلَّا اللَّهُ وَأَشْهَدُ أَنَّ مُحَمَّدًا رَسُولُ اللَّهِ.

اللَّهُمَّ صَلِّ عَلَى سَيِّدِنَا مُحَمَّدٍ وَعَلَىٰ آلِهِ وَأَصْحَابِهِ أَجْمَعِينَ.

أَمَّا بَعْدُ، فَيَا عِبَادَ اللَّهِ، أُوصِيَنِي نَفْسِي وَإِيَّاكُمْ بِتَقْوَى اللَّهِ، فَقَدْ فَازَ الْمُتَّقُونَ.

وَقَالَ تَعَالَى: يَا أَيُّهَا الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنتُمْ مُسْلِمُونَ.

SIDANG JEMAAH YANG DIRAHMATI ALLAH,

Ingatlah, bahawa takwa kita terus diukur oleh Allah SWT pada setiap saat. Janganlah kita terleka walau seketika, kerana janji Allah itu pasti. Kita boleh direnggut pulang pada bila-bila masa, sama ada bersedia atau tidak.

Ayuh kita berdoa memohon kepada Allah, agar tidak dicabut nyawa kita melainkan telah diampunkan segenap dosa, diberkati seluruh kehidupan, disudahi dengan husnul khatimah. Seterusnya kita dikurniakan kebaikan tertinggi di samping para solihin.

MUSLIMIN RAHIMAKUMULLAH,

Kita baru saja menyempurnakan ibadah korban. Moga amalan korban kita itu diterima oleh-Nya. Sesungguhnya ibadah korban ini membersihkan diri daripada dosa, selain mengangkat darjah keimanan kita ke takah yang lebih tinggi.

Pada hari yang penuh keberkatan ini, kita terpilih untuk bersama-sama mengimarahkan masjid bersempena Jumaat, penghulu segala hari. Pengimarahan masjid ini mempunyai kaitan dan gambaran langsung hakikat kita semua sebagai warga kariahnya.

Masjid adalah wajah kariah. Al-Quran menggariskan status tinggi masjid di dalam surah Jin ayat ke-18:

وَأَنَّ الْمَسَاجِدَ لِلَّهِ فَلَا تَدْعُوا مَعَ اللَّهِ أَحَدًا

Maksudnya: *“Dan bahawa sesungguhnya masjid-masjid itu untuk (beribadah kepada) Allah semata-mata. Maka janganlah kamu menyeru sesiapa pun bersama Allah.”*

Tad’u (تَدْعُوا) yang dinyatakan di dalam ayat ini turut membawa makna tiadanya sekutu kepada Allah SWT dan membulatkan ibadah serta penyerahan hanya kepada Allah dengan mengikuti suruhan-Nya di samping menjauhi laranganNya.

SIDANG JUMAAT YANG DIRAHMATI ALLAH SWT,

Seringkali bila menyebut tentang ibadah dan masjid, yang segera tergambar di fikiran kita adalah ritual solat, kuliah, iftar dan kematian. Kita juga akan terbayang sosok yang memimpin aktiviti yang dinyatakan; para ustaz, imam, muazzin dan jawatankuasanya.

Masjid dilihat sebagai tempat melaksanakan ibadah dan kerja berkait kegamaan. Kesannya, sebahagian kita mungkin melazimi untuk solat dan melaksanakan amalan ibadah semata-mata. Tidak lebih daripada itu. Sedangkan hakikatnya, masjid merupakan sebuah institusi, bahkan organisasi terpenting dalam susunan tahap sosial dan agama pada peringkat terendah, pada peringkat lokailiti.

MUSLIMIN YANG DIRAHMATI ALLAH,

Jika kita renung kembali sirah Nabi SAW, kita akan lihat, institusi pertama dibina semasa tibanya Baginda ke kota Yathrib sewaktu peristiwa hijrah adalah masjid. Bermula dari sebuah unit yang beratapkan dedaun tamar, masjid kian bertambah dari satu daerah ke daerah lainnya. Dalam kata lain, semenjak pembinaan masjid pertama, perkembangan dan pertambahan umat Islam akan pasti disusuli dengan pembinaan masjid yang menjadi pusat kemasyarakatan umat di daerahnya. Sehingga ke hari ini, azan masjid kedengaran hampir di setiap penjuru bumi Allah Taala ini.

Itulah hakikat berdirinya sebuah masjid.

MUSLIMIN YANG DIRAHMATI ALLAH,

Meskipun masjid itu dilihat pegun sebagai sebuah bangunan, namun ia bukanlah sekadar bangunan. Masjid mempunyai fungsi sosioekonomi dan kegamaan yang sangat penting, digerakkan oleh setiap insan yang hadir mengimarahkannya sekurang-kurangnya 5 kali sehari.

Masjid adalah institusi disiplin sosial. Azan yang dikumandangkan setiap lima waktu mengingatkan kita bahawa ada perkara yang lebih utama daripada kesibukan kerja semata-mata. Lebih daripada itu, masjid adalah madrasah yang mendisiplinkan umat Islam tentang bidang dan had kuasa siapa imam dan siapa makmum.

Melalui kitabnya *Al-Muhazzab fi Fiqh al-Imam as-Syafi'i*, Abu Ishaq Asy-Syirazi menyebut maksudnya,

“Dimakruhkan seseorang solat menjadi imam bagi suatu kaum, sedangkan kebanyakan tidak menyukainya. Pandangan ini didasarkan pada riwayat Ibnu Abbas RA yang menyatakan bahawa Nabi SAW pernah mengatakan bahawa, ada tiga orang yang Allah tidak mengangkat solat mereka ke atas kepalanya, salah satunya yang disebutkan dalam riwayat tersebut adalah seseorang yang mengimami suatu kaum padahal kaum tersebut tidak menyukainya.”

Di dalam menghujahkan tentang hadis ini, para ulama menyatakan penolakan terhadap imam itu adalah kerana sifat fasiq, yakni onar yang disaksikan dari sudut muamalah dan akhlak. Di dalam hukum ibadah khususiyah, dipertanggungjawabkan kepada makmum untuk menegur imam dengan tertib dan kaedahnya yang digariskan, seandainya berlaku kesilapan.

Selain petunjuk tentang ibadah solat berjemaah, masjid turut menjadi pusat muamalah. Kegiatan ekonomi pesat sekeliling masjid,

di samping kuliah agama dan tazkirah yang disampaikan hampir setiap hari.

MUSLIMIN YANG DIRAHMATI ALLAH,

Pendidikan yang dititipkan melalui institusi masjid bukanlah semata-mata berupa kelas agama yang khusus.

Memetik hadis yang diriwayatkan oleh Anas bin Malik Radhiallahu'anh:

Ketika kami berada di masjid bersama Rasulullah, tiba-tiba datang seorang Arab Badwi lalu berdiri untuk kencing di masjid. Sahabat Rasulullah menggergaknya, tetapi Rasulullah bersabda: *“Janganlah kamu memutuskannya, biarkan dia selesai kencing terlebih dahulu.”*

Maka, mereka (sahabat) membiarkan orang Arab Badwi itu sehingga dia selesai kencing. Selepas itu, Rasulullah memanggil lelaki berkenaan dan menasihatnya, “Sesungguhnya masjid ini tidak boleh digunakan untuk kencing dan kekotoran, masjid adalah tempat untuk berzikir, solat dan membaca al-Quran.”

Selepas itu, Nabi memerintahkan seseorang untuk mengambil satu baldi air dan menyiramnya.

Kisah ini bukan hanya cerminan kelembutan sikap Nabi SAW dalam berdakwah, ia juga isyarat tentang kebijaksanaan ‘masjid’ sebagai institusi pendidikan kepada kelompok yang mungkin tidak pernah atau pertama kali melaziminya.

Tiada herdik. Tiada cacian. Tiada amarah. Masjid adalah pelita yang memancarkan syiar Islam yang indah.

Hakikatnya, masjid adalah institusi pendamai, bukan institusi pemecah. Masjid adalah kelas tarbiyah moral dan adab. Masjid adalah medan *izzah* yakni kemegahan, yakni kemegahan kepada umat Islam seluruhnya.

MUSLIMIN SIDANG JUMAAT SEKALIAN,

Hari ini masjid megah berdiri di seluruh dunia sehingga menimbulkan kekaguman dalam kalangan bukan Muslim. Mereka terpegun melihat masjid penuh setiap minggu dan didampingi setiap waktu solat. Mereka melihat bagaimana orang Islam memenuhi masjid tanpa mengira lapisan, miskin-kaya, berkereta mewah atau hanya berjalan kaki.

Semua yang hadir ke masjid akan duduk separas di lantai untuk solat berjemaah atau mendengarkan khutbah dan kuliah. Tiada apa yang membezakan antara anak kariah yang hadir. Kekaguman ini timbul sedangkan ada di kalangan mereka sendiri adakalanya berusaha-payah mengajak penganut mereka hadir ke rumah ibadah seminggu sekali.

Namun kekaguman itu bukan bermakna kita menganggap bahawa pengoperasian masjid kita sudah sempurna. Tentu saja ada penambahbaikan yang perlu kita lakukan demi mencapai keredhaan Allah SWT. Di awal khutbah mimbar memesan, masjid

bukan hanya kerana mimbarnya, imam, makmum, pengerusi atau dananya.

MUSLIMIN SIDANG JUMAAT SEKALIAN,

Mengakhiri khutbah, suka khatib mengingatkan bahawasanya masjid adalah dinamo yang mengalirkan hayat agama kita. Lesunya masjid, keluh kesah kariahnya, adalah adalah antara tanda kemelut yang membelenggu umat.

Memakmur dan melazimi masjid adalah taklif 'aini' kepada kita semua. Sebagai lelaki Muslim, kitalah jantung yang menggerakkan nadi masjid di dalam kariah masing-masing. Jangan hanya kita menuding masjid seolah-olah ia merupakan organisasi asing daripada akidah yang kita anuti. Masjid dan keberadaannya adalah wajah kita sebagai kariahnya. Masjid yang subur keakraban kariah, program anjuran dan sambutannya adalah gambaran nilai masyarakat setempatnya.

Sejauh manakah masjid kita ini menyebarkan sinar dan syiar Islam kepada warga di sekelilingnya? Baik kepada Muslim yang sudah sedia komited mahupun yang masih jauh daripada masjid, baik bagi yang beriman mahupun yang belum Islam. Itulah persoalan yang harus kita renungi dan insafi bersama.

Tepuk dada tanyalah iman.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهَدْيِ سَيِّدِ الْمُرْسَلِينَ،
أَقُولُ مَا سَمِعْتُمْ، وَأَسْتَغْفِرُ اللهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ،
فَأَسْتَغْفِرُوهُ، إِنَّهُ هُوَ الْعَفُورُ الرَّحِيمُ.



Khutbah Kedua Bulan Jun

2024M/ 1445H

الْحَمْدُ لِلَّهِ عَلَىٰ آلِهِ وَإِحْسَانِهِ، وَالشُّكْرُ لَهُ عَلَىٰ تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِشَأْنِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَىٰ رِضْوَانِهِ.
صَلَّى اللَّهُ وَسَلَّم عَلَىٰ سَيِّدِنَا مُحَمَّدٍ وَعَلَىٰ آلِهِ وَصَحْبِهِ، عَدَدَ خَلْقِهِ وَرِضَا
نَفْسِهِ، وَزِينَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ
عَلِيمًا حَكِيمًا:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا

تَسْلِيمًا ﴿٥٦﴾ [الأحزاب: 56]

اللَّهُمَّ صَلِّ وَسَلِّمْ عَلَىٰ عَبْدِكَ وَرَسُولِكَ مُحَمَّدِ بْنِ الْبَشِيرِ النَّذِيرِ، وَالسَّرَاجِ
الْمُنِيرِ، وَارْضَ اللَّهُمَّ عَنِ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ
تَبِعَهُمْ بِإِحْسَانٍ إِلَىٰ يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا
أَرْحَمَ الرَّاحِمِينَ.

SIDANG JUMAAT YANG DIRAHMATI,

Masjid telah menjadi bahagian yang penting di dalam kehidupan seorang Muslim. Ia menjadi institusi yang turut menjadi pencetus kemajuan umat seperti yang terbukti di dalam sirah. Seluruh kehidupan umat Islam dilingkari dengan masjid sebagai pusat aktivitinya.

Selain kewajiban kita mengimarahkan masjid setiap kali laungan azan, masjid juga merupakan sebuah intitusi penting yang seharusnya menjadi pemersatu kariah. Masjid bukan hanya untuk menangani isu setempat tetapi juga dalam membina fikrah yang sejajar dengan tuntutan zaman.

Setiap hari kita berdepan dengan seribu satu cabaran baru, maka fikrah umat juga perlu dititipkan dengan pendedahan tentang perubahan semasa.

Seluruh umat Islam ini disatukan oleh aqidah yang sama tidak kira walau dimana kita berada. Firman Allah dalam Surah Ali Imraan, ayat 103:

Maksudnya: *“Berpegang teguhlah kamu seluruhnya dengan tali Allah (agama Islam) dan janganlah kamu berpecah belah.”*

Al-Imam al-Qurtubi Rahimahullah telah menjelaskan ayat ini dalam kitab tafsirnya, maksudnya:

"Janganlah kamu berpecah belah dengan mengikuti hawa nafsu dan kehendak-kehendak yang berbeza, dan jadilah bersaudara di dalam agama Allah. Maka yang demikian itu akan menghalang kamu dari berpecah belah dan saling bermusuhan."

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ أَعِزِّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَأَنْصُرْ مَنْ نَصَرَ
الدِّينَ، وَاخْذُلْ مَنْ خَذَلَ الْمُسْلِمِينَ، وَأَعْلِ كَلِمَتَكَ إِلَى يَوْمِ الدِّينِ.

اللَّهُمَّ أَنْصُرْ إِخْوَانَنَا الْمُسْلِمِينَ وَالْمَجَاهِدِينَ وَالْمُسْتَضْعَفِينَ فِي فَلَسْطِينَ
وَفِي كُلِّ مَكَانٍ، اللَّهُمَّ ثَبِّتْ إِيمَانَهُمْ وَأَنْزِلِ السَّكِينَةَ فِي قُلُوبِهِمْ وَوَحِّدْ
صُفُوفَهُمْ.

اللَّهُمَّ وَفِّقْ قَادَتَنَا وَرُعَمَاءَنَا وَوُلَاةَ أُمُورِنَا لِمَا فِيهِ عِزُّ دِينِكَ وَنَصْرُ شَرِيعَتِكَ،
اللَّهُمَّ اجْعَلْهُمْ هُدَاةً مُهْتَدِينَ صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ
وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-
Pertuan Agong, Sultan Ibrahim dan Kebawah Duli Yang Maha
Mulia Seri Paduka Baginda Raja Permaisuri Agong, Raja Zarith
Sofiah.

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji
Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْعَلَاءَ وَالرِّيَاءَ، وَالرِّبَا وَالرِّبَا وَالزَّلَازِلَ وَالْمِحْنَ
وَسُوءَ الْفِتَنِ مَا ظَهَرَ مِنْهَا وَمَا بَطَّنَ عَن بَلَدِنَا هَذَا خَاصَّةً، وَعَن سَائِرِ بِلَادِ
الْمُسْلِمِينَ عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta dapat mengeluarkan zakat dan melaksanakan waqaf.

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, masyarakat dan negara. Ya Allah! Kuatkan iman

kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ
الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٥﴾ فَادْكُرُوا اللَّهَ الْجَلِيلَ
يَذْكُرْكُمْ، وَاشْكُرُوهُ عَلَىٰ نِعْمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا
تَصْنَعُونَ ﴿١٥﴾